

# Musiekgenres

Musiek is reeds vir baie eeue iets spesiaal, amper soos 'n taal. Daar word nie verniet gesê musiek begin waar woorde ophou nie! Soms is 'n mens in die bui vir rustige klassieke musiek as jy wil ontspan, en ander keer weer vir vinnige dansmusiek as jy oefening doen of partytjie hou.

Daar is baie verskillende soorte **musiek** wat in uiteenlopende taal-, kultuur- en ouderdomsgroepe se smaak val. Musiek word in verskillende **musiekgenres** verdeel. Die **ritme**, **melodie** en **harmonie** van die musiek bepaal onder watter musiekgenre dit ingedeel word. <sup>1</sup>

## Die vernaamste musiekgenres

### Klassieke musiek

Die term *klassieke musiek* word meestal gebruik om na Europese klassieke musiek of musiek uit die klassieke era te verwys. Dit verwys ook na musiek van aangeleerde **tradisies** wat deur instellings geleer word. <sup>2</sup>

Die klassieke era van musiek verwys na musiek wat vanaf die 16<sup>de</sup> eeu tot die begin van die 19<sup>de</sup> eeu gekomponeer is, met die klem hoofsaaklik op vorm. Dit sluit in werk van die Duitse en Oostenrykse **komponiste** Gluck, [Haydn](#), [Mozart](#) en [Beethoven](#). Hierdie tydperk – gedurende ongeveer 1740 en 1810 – staan as die *klassieke tydperk* bekend. Dit is voorafgegaan deur 'n baroktydperk met komponiste soos Schütz, Bach, Händel en gevolg deur die tydperk van die romantiek met, onder andere, [Chopin](#) en Schumann. <sup>2</sup>

Kenmerkend van hierdie musiekgenre is die gebruik van veelvuldige instrumente wat die genoteerde musiek uitvoer, bekend as 'n simfonie-orkester. Die musiekstyl is ook op sekere beginsels van **komposisie** en **polifonie** gebaseer. **Sonates** en simfonieë is ook kenmerkend aan dié musiekvorm. <sup>3</sup>



## Voorbeelde

Die musiek van Wolfgang Amadeus Mozart (1756-1791) en Ludwig von Beethoven (1770-1827) is deel van wêreldbekende klassieke musiek wat vandag nog deur kunstenaars opgevoer word en in verskeie opvoerings gebruik word. <sup>3</sup>

## Opera

*Opera* word beskou as 'n toneelstuk wat opgevoer word waarvan die dialoog (dit wat die mense sê) eerder gesing as gepraat word. 'n Opera word meestal met die volle begeleiding van 'n simfonie-orkestr uitgevoer en soms ook met ander kunsvorme soos ballet gekombineer. <sup>2</sup> Hierdie musiekvorm het rondom die 1600's ontstaan toe 'n groep musikante, digters en filosowe die Griekse tragedie - 'n vorm van teater van antieke Griekeland - wou laat herleef. Opera word gekombineer met indrukwekkende kostuums en verbeeldingryke dekor. <sup>3</sup>



## Voorbeelde

Een van die gewildste operas is *Die Towerfluit* deur Wolfgang Amadeus Mozart. <sup>3</sup>

## Ruk-en-rol (*rock and roll*)

Dié musiekstyl dateer uit die 1950's en het sy oorsprong in die Verenigde State van Amerika (VSA) gehad. Dit word deur elektriese kitare, lawaaierige dromme en 'n harde gesing gekenmerk. <sup>4</sup>



## Voorbeelde

[Elvis Presley](#) was een van die gewildste rocksterre, en die suksesvolste rockgroep was The Rolling Stones, wat oor meer as 50 jaar wêreldwye sukses met hul albums en konserte behaal het. Die Beatles was 'n Engelse rockgroep wat in die 1960's tot stand gekom het en word as een van die invloedrykste musiekgroepe van alle tye beskou.

# Popmusiek (populêre musiek)

Dit is moderne, gewilde musiek met 'n treffende melodie en sterk ritme. Dit steun op elektroniese [klanke](#) en het 'n vinnige tempo met woorde wat baie herhaal. <sup>2</sup> *Popmusiekkultuur* verwys na 'n vermenging van musiek, die voorkoms en optrede van die musikante, asook verhoogvertonings met ligeffekte en choreografie wat alles saamkom om 'n verdiepte ervaring te skep. Dit staan ook algemeen as dans- of treffermusiek bekend. Hierdie soort musiek word ook veral deur die massamedia - soos deur [radio](#) en TV-uitsendings - gespeel. Musiekvideo's van dié treffers is ook 'n integrale deel van popmusiek. <sup>3</sup>



## Voorbeelde

Taylor Swift en Justin Bieber is bekende popsterre, en albei is bekend vir hul skouspelagtige vertonings wat duisende toeskouers lok. Michael Jackson is tydens die 1980's as die "koning van pop" bestempel en was bekend vir sy "moonwalk", 'n dansbeweging waartydens hy hom na agter getrek het asof hy vorentoe loop. <sup>3</sup>

# Gospelmusiek

Gospel- en spirituele musiek is godsdienliedere wat uit die musiektradisies van Afrika-slawe in die VSA ontwikkel het. Die musiek van die Afro-Amerikaners is dikwels op die beginsel van roep en reageer gegrond. Daar is soms 'n voorsanger wat 'n frase op sy eie sing (of roep), gevolg deur die musikale reaksie van die koor. Gospelmusiek word meestal deur kore uitgevoer met ritmiese handeklap of musiek, maar word ook deur solokunstenaars uitgevoer. Hierdie musiekgenre het deur die jare uitgebrei, en dit het 'n groot aanhang onder gelowiges. Gospelmusiek het ook vandag verdere variasie in die vorm van lofprysing- en aanbiddingmusiek, asook Christelike kontemporêre musiek. <sup>3</sup>



## Voorbeelde

James Cleveland (1931-1991) word as die "kroonprins van gospel" beskou. Hy was ook 'n pianis, vervaardiger en komponis, het drie Grammy-musiektoekennings

ontvang en is vereer vir sy bydrae tot gospelmusiek met die skryf van meer as 400 gosselliedjies.<sup>5</sup> Bekende sangers van Christelike kontemporêre musiek sluit in Michael W. Smith en Lauren Daigle.

## Blues

Die blues - wat oorspronklik mondelings oorgedra is - vertel stories van die alledaagse lewe. Die twaalfmaatstruktuur (met 'n kenmerkende opvolging van harmonieë) is tipies van die blues. Dit gebruik ook die bluestoonleer, wat een bykomende toon - die sogenaamde bluesnoot - tot die pentatoniese skaal (vyf note per oktaaf) voeg.<sup>3</sup>



### Voorbeelde

Die Amerikaanse sangeres Bessie Smith is - vanweë die passie waarmee sy bluesmusiek gesing het - die "keiserin van die blues" genoem. Kitaarspeler en sanger Riley B. King is as die "koning van die blues" beskou. Later jare het Eric Clapton ('n Britse kitaarspeler) bekendheid as 'n ikoon van rock en die blues verwerf. Hy het in sy tienerjare opnames van die ou bluesmeesters bestudeer, wat die basis van sy musiekloopbaan in hierdie genre gevorm het.<sup>3</sup>

## Rhythm and blues (R&B)

"Rhythm and blues" is 'n musiekstyl wat die elemente van blues, soul, hip-hop en pop kombineer. Gedurende die 1940's is R&B meestal deur groot orkeste opgevoer, maar deesdae word die musiekgenre ook deur baie solokunstenaars beoefen.<sup>3</sup>



### Voorbeelde

Beyoncé het al verskeie toekennings vir haar musiek ingepalm, onder andere 28 Grammy-musiektoekennings. Sy het al meer as 118 miljoen albums wêreldwyd verkoop. Mariah Carey word as een van die voorlopers van kontemporêre R&B, asook 'n inspirasie vir vele jonger kunstenaars beskou. Met meer as 200 miljoen

albums wêreldwyd verkoop, bly sy 'n gewilde kunstenaar wat groot spore in die musiekbedryf trap.

## Jazzmusiek

Jazzmusiek word aan [improvisasie](#) (om op die ingewing van die oomblik te verander of aan te pas) - op 'n sekere ritme, asook met 'n bepaalde struktuur - gekenmerk. Dit word ook met instrumente en sangstemme uitgevoer, veral blaasinstrumente, soos 'n saksofoon en trompet. <sup>6</sup> Vroeë soorte jazz het ragtime, New-Orleans-jazz en swing ingesluit. In die swingera van die 1930's het orkesgroepe tot groot jazzorkeste ontwikkel wat groot vertonings in New York gehou het. Ander style - soos "cool jazz", "free jazz" en "fusion jazz" - het dikwels in mekaar gevloei. Vandag is daar steeds talle ontwikkelinge in jazz, en hierdie musiekgenre word soms selfs met ander musiekstyle soos popmusiek gekombineer. <sup>3</sup>



## Folkmusiek

Die term folkmusiek (ook genoem volksmusiek) word gebruik om liedere of instrumentmusiek van spesifieke lande, streke of mense te beskryf. Hierdie soort musiek word ook aan die tradisies en kultuur van 'n sekere groep mense verbind. Dit gee meestal iets van die streek, geskiedenis en gewoontes van 'n gebied weer. Hierdie genre kan ook as tradisionele musiek gesien word. <sup>3</sup>



### Voorbeelde

Kwaito, kwêla en [Afrikaanse](#) popmusiek bevat elemente van folkmusiek. Van die bekendste folkmusiekkunstenaars is Bob Dylan en Simon & Garfunkel. <sup>7</sup>

## Countrymusiek

Die Amerikaanse countrymusiek is 'n samestelling van laat elemente van die folkmusiek van die Britse Eilande en blues. Afgesien van kitare en

slaginstrumente gebruik dit ook instrumente soos banjo's, mandoliene, viole en mondfluitjies. Nashville in die VSA word as die tuiste van countrymusiek beskou. <sup>3</sup>



### **Voorbeelde**

Johnny Cash (1932-2003) was 'n wêreldbekende countrysanger wat bekendheid gedurende die 1950's verwerf het. <sup>3</sup> Die immergewilde Dolly Parton het ook 'n groot bydrae tot countrymusiek gelewer, wat steeds 'n gewilde musiekgenre in veral die VSA is. Hedendaagse kunstenaars soos Blake Sheldon en Carrie Underwood kombineer ook countrymusiek met popklanke.

## **Kletsrym**

### **Hip-hop**

Tieners op die strate van New York het hip-hop ontwikkel om hulself van die gewilde nagklubmusiek te onderskei. Die hoofelemente van hip-hop is ritme, basklanke en rapmusiek (kletsrym). Die musiekstyl word as 'n jeugkultuur - wat deur spesifieke kleredrag, briedans en graffitikuns gekenmerk word - gesien. Dit gaan ook soms gepaard met 'n platejoggie (DJ) wat die klank met 'n draaitafel verskaf en iemand wat rapmusiek beoefen. <sup>3</sup>



Kletsrym, ook genoem rap of rapmusiek, is 'n uitvloeisel van hip-hop en bestaan uit rymende woorde wat ritmies op die maat van musiek voorgedra of gepraatsing word. <sup>2</sup> Kletsrym is 'n populêre musiekstyl wat ook in Suid-Afrika groot aanhang het, selfs in Afrikaans.

### **Voorbeelde**

Die Amerikaanse Jay-Z word as 'n kletsrymer met 'n groot invloed op die hip-hop-genre beskou. In Suid-Afrika word die kunstenaars Early B, Snotkop en Jack Parow as kletsrymers wat na die hip-hop-genre neig, gesien.

# Musiekblyspel (ook bekend as musiekteater of Broadway)

'n Musiekblyspel is 'n film- of teaterproduksie waarin dialoog afgewissel word met sang, groepsang en danse. Hierdie opvoering het meestal 'n sentimentele of komiese karakter en vertel 'n storie vir die gehoor. <sup>2</sup> Hierdie musiekvorm kombineer elemente van opera, **operette**, **vaudeville**, revue en [drama](#). Dit gaan gewoonlik met verbeeldingryke dekor en indrukwekkende [kostuums](#) gepaard. <sup>3</sup>



## Voorbeelde

Musiekblyspele van die Britse komponis [Andrew Lloyd Webber](#) is wêreldberoemd. Hy het onder meer *Cats* en *The Phantom of the Opera* geskryf. <sup>3</sup> Nog bekende musiekblyspele is *West Side Story*, *Singin' in the Rain*, *High School Musical* en *The Greatest Showman*.



Andrew Lloyd Webber

## Woordbank

<b>musiek</b>	'n Reeks aangename/interessante klanke voortgebring deur instrumente of die menslike stem.
<b>genre</b>	Soort; tipe; veral literatuur- of kunsoort.
<b>melodie</b>	'n Eenstemmige opeenvolging van tone in 'n ritmiese, afgeronde orde. Dit word dus gesien as 'n groep verskillende toonhoogtes (lae en hoë frekwensies) wat uit note van verskillende lengtes bestaan en saam die melodie vorm.
<b>harmonie</b>	Die vereniging van gelyktydige of opeenvolgende tone wat mooi/aangenaam is om na te luister; sameklank.
<b>simfonie</b>	Veelstemmige musiekstuk vir stryk- en blaasorkes met verskeie gekontrasteerde, maar verwante bewegings.

<b>sonates</b>	Musiekstuk vir instrumente - veral vir die klavier - wat dikwels uit drie of meer gedeeltes bestaan.
<b>komponiste</b>	Iemand wat musiek skryf of 'n skepper van musiekstukke.
<b>komposisie</b>	'n Musiekstuk.
<b>polifonie</b>	'n Meerstemmige/-tonige musiekstuk.
<b>operette</b>	'n Komiese of romantiese toneelstuk waarin die meeste van die woorde gesing word.
<b>vaudeville</b>	'n Lugtige musikale toneelstuk met vrolike, komiese liedjies, dikwels satiries. Genoem na 'n Franse digter, gebore te Vau de Vire in Normandië.

## Lees dié om meer te wete te kom

- ['n Mens kry baie verskillende soorte musiek en subgenres](#)
- [Meer oor die verskillende musiekgenres](#)
- [Van die gewildste musiekgenres](#)

## Luister hierdie om nog meer te leer

**Die beste van Mozart**

**Koormusiek van Stellenbosch Universiteitskoor**

**Kombinasie van pop- en countrymusiek**